



Skýrsla æskulýðsnefndar Blæs 2019



Í æskulýðsnefnd Blæs 2019 sitja Þórhalla Ágústsdóttir æskulýðsfulltrúi, Rósa Dögg Þórsdóttir, Anna B Sigurðardóttir, Linda María Emilsdóttir, Margrét Linda Erlingsdóttir og Heiðrún Þorsteinsdóttir.

Í Blæ er lögð áhersla á að halda uppi virku og öflugum æskulýðsstarfi enda er það grunnurinn að framtíð félagsins. Reynt er að hafa sem flesta viðburði á vegum félagsins við hæfi allra aldurshópa og brúa kynslóðabilið sem víðast. Þannig eru félagsreiðtúrar t.d. miðaðir við að krakkar geti tekið þátt í þeim og hestaferð félagsins er við hæfi allra sem orðnir eru þokkalega hestfærir. Félagsaðstaðan okkar er orðin afar góð og býður upp á stórbætta möguleika til æskulýðsstarfs.

Reiðnámskeið og knapamerki voru á dagskrá vetrarins þar sem Reynir Atli Jónsson kenndi í helgarlotum. Félagið greiddi námskeiðið verulega niður fyrir æskulýðinn auk þess sem krakkarnir sinna fjáröflun sjálfir. Þátttaka var góð og höfðu allir gagn og gaman af. Blandaður hópur barna og fullorðinna tók knapamerki 1 og 2 hjá Reyni og er stefnan að hafa knapamerki í boði mjög reglulega.

Æskulýðsdagar eru í raun hápunktur æskulýðsstarfsins og voru haldnir 7.-10. júní á félagssvæði Blæs í blíðskaparveðri. Æskulýðsdagar hafa lengi verið árviss atburður í félaginu og á undanförunum árum hefur þátttakan verið jöfn og góð. Í ár tóku 40 hressir krakkar á aldrinum 4-15 ára þátt í æskulýðsdögum og er það með því allra mesta. Helga Rósa Pálsdóttir var reiðkennari þetta árið og fórst það mjög vel úr hendi. Ákveðið var að lengja æskulýðsdaga aðeins í fyrra vegna fjölda áskorana frá æskulýðnum og var sami háttur hafður á núna, byrjað á föstudagskvöldi og síðan var sleitulaust fjör fram á mánudagskvöld. Þó hestamennska og fræðsla tengd henni sé í fyrirrúmi á þessum dögum þá er ýmislegt fleira sér til gamans gert s.s. farið í sundferðir, leiki, sungið, haldnar kvöldvökur, farið í gönguferðir, óvissuferðir og grillað. Listasmíður voru alla dagana þar sem unnið var með hestatengd þemu, unnið var af mikilli gleði að skemmtiatriðum fyrir kvöldvöku, hópefli og fræðsla var meginþemað fyrsta kvöldið, og hestasnyrting og reiðtygjaumhirða var á sínum stað. Síðasta daginn var slegið upp skrautsýningu þar sem stoltir knapar léku listir sínar og sýndu árangur námskeiðsins. Allir voru velkomnir á sýninguna sem var vel sótt og endaði með grillveislu. Það skapast alltaf ótrúlega góð stemmning á æskulýðsdögum og reglurnar eru einfaldara: Allir eru vinir og við þössum öryggið. Æskulýðsnefndin og félagar úr Blæ vinna mikla sjálfboðavinnu á æskulýðsdögum, t.d. þarf að sjá um matinn, allt hópastarfið, vera með í reiðtúrum og gæta krakkanna á nóttunni, flytja þá í sund og á aðra viðburði sem fram fara utan hestasvæðis, auk þess að sjá um allan undirbúning. Krakkarnir dvelja á félagssvæðinu meðan á æskulýðsdögunum stendur, í tjöldum ef veður leyfir en annars í félagshúsi Blæs. Öllum krökkum sem geta útvegað sér reiðskjóta er heimil þátttaka á æskulýðsdögum og þátttökugjald er ekkert. Æskulýðsnefndin reynir af fremsta megni að vera þeim innan handar sem vilja vera með en gengur illa að finna reiðskjóta og Hestaleigan Skorrahestar á heiður skilinn fyrir sitt framlag til æskulýðsdaga en þau hafa bæði lánað heilmarga hesta og unnið ærið sjálfboðastarf. Á æskulýðsdögum var hluti hópsins að stíga sína allra fyrstu skref í hestamenskunni en aðrir voru lengra komnir. Aldursbilið virðist alltaf þurrkast algjörlega út á æskulýðsdögum og þar myndast með góðu utanumhaldi þéttur og skemmtilegur hópur þar sem allir hjálpast að og deila yndislegum upplifunum í samveru við hestana sem eru að sjálfsögðu kjarninn í öllu saman. Það er alltaf ótrúlega gaman að fylgjast með framförum sem verða hjá krökkunum á æskulýðsdögum þar sem þau eru allan daginn í reiðtímum, reiðtúrum og hópastarfi tengdu hestum, sjá þetta einstaka samband sem skapast milli hests og knapa og þarna kviknar sannarlega áhugi hjá mörgum sem annars fengju ef til vill ekki tækifæri til að kynnast hestamennsku.

Til starfsins þetta árið naut æskulýðsdeildin góðra styrkja, aðallega frá SÚN og Spretti en auk þess var deildin með eigin fjáraflanir sem gengu vel, t.d. sölu á jólamarkaði Dalahallarinnar. Það er ómetanlegt fyrir okkur að eiga góða bakhjarla og gerir það að verkum að framboð viðburða verður mun fjölbreyttara og hægt er að auka möguleika allra á að kynnast og stunda hestamennsku.

Í æskulýðsstarfinu er oft erfitt að finna góðan tíma til samverustunda og námskeiðahalds vegna þess hversu upptekið unga fólkið er í öðrum íþróttum. Við reynum þó að finna út hvað hentar hverju sinni og leitumst við að styðja sem best við bakið á þeim eru virkir auk þess að laða til okkar nýja áhugasama félaga sem geta haldið starfinu okkar gangandi.

Með bestu kveðju

Æskulýðsnefnd Blæs

